

## გ ა ნ ც ხ ა დ ე ბ ა

ქართული ანბანის თემაზე საკოლექციო დანიშნულების 1 ლარის ნომინალის მონეტების სერიის დიზაინის ესკიზების შესარჩევი კონკურსის შესახებ

### განმცხადებელი:

საქართველოს ეროვნული ბანკი, მისამართი: თბილისი, სანაპიროს ქ. N2. ტელ: (+995 32) 2 406 471, ცხელი ხაზი: (995 32) 2 406 406 ელ-ფოსტა: [info@moneymuseum.nbg.ge](mailto:info@moneymuseum.nbg.ge), ვებ-გვერდი: [www.nbg.gov.ge](http://www.nbg.gov.ge)

### კონკურსის მიზანი:

ქართული დამწერლობის ისტორია საუკუნეებს ითვლის, ხოლო დამწერლობის მქონე რამდენიმე ასეული ენიდან ქართული ენა და ანბანი ერთ-ერთ უძველეს სრულყოფილ ანბანურ სისტემადაა აღიარებული. 2016 წელს UNESCO-ს მიერ „ქართული ანბანის სამი უძველესი სახეობის ცოცხალი კულტურა“ აღიარებულ იქნა მსოფლიო არამატერიალური კულტურული მემკვიდრეობის ძეგლთა სიაში. ქართულმა ანბანმა თავისი არსებობის მანძილზე რამდენიმე საფეხური განვლო ასომთავრულიდან მხედრულამდე რომლიც თანამედროვე სახით 33 ასო-ნიშნით არის წარმოდგენილი.

საქართველოს ეროვნულმა ბანკმა გადაწყვიტა, ამ თემაზე გამოუშვას საკოლექციო დანიშნულების 1 ლარის ნომინალის მონეტების სერია, რომელიც მთლიანობაში მოიცავს ინდივიდუალური ასო-ნიშნის ამსახველ 33 მონეტას.

ამ კონკურსის მიზანია, შეარჩიოს ქართული ანბანის სერიის საუკეთესო კონცეფცია და დიზაინის ესკიზები (33-ვე ასო-ნიშანზე).

კონკურსში მონაწილეობის მსურველებმა ესკიზები უნდა წარმოადგინონ თანდართული პირობების მიხედვით.

### კონკურსის ტიპი: ღია კონკურსი

*კონკურსში მონაწილეობის მიღება შეუძლია ნებისმიერ მსურველს - როგორც ფიზიკურ (რეზიდენტი/არარეზიდენტი), ასევე იურიდიულ (რეზიდენტი/არარეზიდენტი) პირს, რომელიც აკმაყოფილებს ქვემოთ მოცემულ საკონკურსო პირობებს და წარმოადგენს დიზაინის ესკიზს (ესკიზებს) დადგენილ ვადებში, გარდა საქართველოს ეროვნული ბანკის პრეზიდენტის 2016 წლის 27 ივლისის N76/04 ბრძანებით შექმნილი „საკოლექციო დანიშნულების ლარის ბანკნოტებისა და მონეტების თემატიკის (თემის) განსაზღვრისა და დიზაინის ესკიზის / ესკიზების შერჩევის“ დროებითი კომისიის წევრებისა და საქართველოს ეროვნული ბანკის თანამშრომლებისა.*

განცხადების გამოქვეყნების თარიღი: 10.10.2018

### სამართლებრივი საფუძვლები:

- ✓ „საქართველოს ეროვნული ბანკის შესახებ“ საქართველოს ორგანული კანონი
- ✓ საქართველოს ეროვნული ბანკის საბჭოს 2010 წლის 10 ივნისის N5 დადგენილებით დამტკიცებული „ლარის ბანკნოტებისა და მონეტების დამზადების წესი“ (1-3 მუხლები)
- ✓ საქართველოს ეროვნული ბანკის საბჭოს 2011 წლის 7 თებერვლის N5 განკარგულებით დამტკიცებული „ლარის ბანკნოტებისა და მონეტების დამზადების შესყიდვის წესი“ (1-4 მუხლები)
- ✓ “2019 წლის მნიშვნელოვან თემებზე საკოლექციო დანიშნულების მონეტების გამოსაშვებად მოსამზადებელი სამუშაოების დაწყების შესახებ” საქართველოს ეროვნული ბანკის საბჭოს 2018 წლის 30 იანვრის N3 განკარგულება

- ✓ საქართველოს ეროვნული ბანკის პრეზიდენტის 2016 წლის 27 ივლისის N76/04 ბრძანებით შექმნილი „საკოლექციო დანიშნულების ლარის ბანკნოტებისა და მონეტების თემატიკის (თემის) განსაზღვრისა და დიზაინის ესკიზის / ესკიზების შერჩევის“ დროებითი კომისიის 2018 წლის 2 ოქტომბრის N11 ოქმი

## ქართული ანბანის თემაზე საკოლექციო დანიშნულების 1 ლარის ნომინალის მონეტების დიზაინის ესკიზების შესარჩევი კონკურსის

### პირობები

#### მუხლი 1. საკონკურსო პროექტის აღწერილობა:

კონკურსანტს მოეთხოვება მონეტის დიზაინის ესკიზ(ებ)ისა და ქართული ანბანის სერიის კონცეფციის მომზადება-წარმოდგენისას გაითვალისწინოს შემდეგი პირობები:

1. მონეტის მახასიათებლები: ნომინალი - 1 ლარი; ფერი - ვერცხლისფერი; დიამეტრი - 27 მმ; წიბო (გურტი) - გლუვი;
2. თემა: ქართული ანბანი;
3. გამოსაშვები მონეტების დანიშნულება: საკოლექციო;
4. ესკიზების რაოდენობა: არაუმეტეს ორი ესკიზისა ერთ ასო-ნიშანზე;
5. მხატვრული შესრულების მოთხოვნები:
  - 5.1. დიზაინი უნდა შეიცავდეს შემდეგ სავალდებულო ელემენტებს:
    - 5.1.1. ვალუტის დასახელებას ქართულ ენაზე და ნომინალურ ღირებულებას ციფრით - „1 ლარი“;
    - 5.1.2. ემიტენტი ქვეყნის დასახელებას ქართულ და ინგლისურ ენებზე - „საქართველო“, „Georgia“;
    - 5.1.3. გამოშვების წელს - „2020“;
    - 5.1.4. ინდივიდუალურ ასო-ნიშანს თანამედროვე ქართული ანბანური (მხედრული) ასოებიდან, რომელიც განსხვავებული იქნება ქართული ანბანის სერიის თითოეული მონეტისთვის.
    - 5.1.5. მონეტის დიზაინის ესკიზის ერთი მხარე (ავერსი) უნდა შეიცავდეს ნომინალის აღმნიშვნელ ციფრს და საერთო უნდა იყოს 33-ვე მონეტისათვის, ხოლო მეორე მხარე (რევერსი) უნდა შეიცავდეს ქართული ანბანის ერთ ასო - ნიშანს თითოეული მონეტის დიზაინის ესკიზისათვის ინდივიდუალურად.
  - 5.2. აღნიშნული სავალდებულო ელემენტების განთავსება (გარდა ნომინალისა) შესაძლებელია მონეტის ავერსზე და/ან რევერსზე კონკურსანტის შეხედულებისამებრ.
  - 5.3. კონკურსანტს შეუძლია საკუთარი შეხედულებისამებრ შეარჩიოს და დიზაინში დამატებით გამოიყენოს ლარის სიმბოლო - „ლ“, ძველქართული ასო(ები), სიტყვა(ები), ქარაგმები და/ან სხვა წარწერ(ებ)ი, რეკვიზიტ(ებ)ი, დეტალ(ებ)ი, გამოსახულებები, გარდა კონკრეტული პიროვნების (მათ შორის კონკურსანტის) სახელის, გამოსახულების, ემბლემის, ლოგოს, საფირმო ნიშნის და/ან სხვა ინტელექტუალურ საკუთრებასთან დაკავშირებული კომერციული ორგანიზაციის დასახელების ან/და იდენტიფიკატორისა;
  - 5.4. სხვა მოთხოვნები დიზაინთან მიმართებაში:
    - 5.4.1. შეესაბამებოდეს საკონკურსო მონეტის თემას, დანიშნულებას და მახასიათებლებს (*მნიშვნელოვანია*);
    - 5.4.2. იყოს ინდივიდუალური (რევერსი), თუმცა შეადგენდეს ქართული ანბანის სერიის ერთიანი კონცეფციის შემადგენელ ნაწილს (*მნიშვნელოვანია*);

5.4.3. იყოს კონკურსანტის საკუთარი ნამუშევარი (ორიგინალი), ამასთან, დიზაინში სხვა რაიმე სიმბოლოს და/ან დეტალის გამოყენების შემთხვევაში, კონკურსანტის მიერ მითითებული უნდა იქნეს ასეთი სიმბოლოს და/ან დეტალის პირველწყარო (*მნიშვნელოვანია*);

5.4.4. არ უნდა იყოს ასლი ან მსგავსი სხვა მონეტის დიზაინის (*მნიშვნელოვანია*);

5.4.5. შეიცავდეს ფერად დეტალს (*სასურველია*).

6. ტექნიკური შესრულების მოთხოვნები:

6.1. საკონკურსო ესკიზები უნდა შესრულდეს A4 ზომის ფორმატზე, როგორც საპრეზენტაციო, ისე მონეტის ორიგინალური ზომით და მათი წარმოდგენა სავალდებულოა ნახატის / ესკიზის სახით ქალაქში. იმ შემთხვევაში, თუ კონკურსანტი გადაწყვეტს წარმოსადგენ ესკიზებს დაურთოს, ასევე, ელექტრონული/ციფრული (ელექტრონულ მატარებელზე ჩაწერილი) ესკიზებიც, ელექტრონულ ფაილში (ატრიბუტები) არ უნდა იყოს მითითებული კონკურსანტის სახელი, გვარი და/ან სხვა საიდენტიფიკაციო მონაცემები.

7. ესკიზ(ებ)ს თან უნდა ერთვოდეს დიზაინის ესკიზების აღწერილობის ტექსტი ამ მუხლის 5.4.3 პუნქტის მოთხოვნის გათვალისწინებით და დიზაინის შინაარსის დეტალური და მკაფიო განმარტება.

8. კონკურსანტს შეუძლია წარმოადგინოს მაქსიმუმ 2 განსხვავებული ესკიზი თითოეული ასონიშნისთვის.

9. კონკურსანტმა ეროვნულ ბანკში უნდა წარმოადგინოს ქონებრივად და უფლებრივად უნაკლო ესკიზები. არცერთ მესამე პირს არ უნდა გააჩნდეს ქონებრივი, უფლებრივი ან ინტელექტუალური მოთხოვნები კონკურსანტის მიერ წარმოდგენილი ესკიზების მიმართ.

**მუხლი 2. საკონკურსო ესკიზების საქართველოს ეროვნულ ბანკში წარმოდგენის ფორმა და ვადა:**

1. კონკურსანტმა საკონკურსო მასალა უნდა წარმოადგინოს თანდართული ფორმის (დანართი 1) განაცხადთან ერთად. განაცხადი უნდა შეიცავდეს კონკურსანტის პირად მონაცემებს (კონკურსის დასახელება, ფიზიკური პირის შემთხვევაში კონკურსანტის სახელი, გვარი, ხელმოწერა, მისამართი და საკონტაქტო ტელეფონი, ხოლო იურიდიული პირის შემთხვევაში - საფირმო სახელწოდება, საიდენტიფიკაციო კოდი, ხელმძღვანელი პირის სახელი, გვარი, ხელმოწერა და საკონტაქტო მონაცემები) და თანხმობას/დასტურს საკონკურსო პირობების შესრულებაზე.

2. კონკურსანტმა საკონკურსო მასალა და განაცხადი უნდა მოათავსოს ცალ-ცალკე, განსხვავებული ზომის ორ დალუქულ კონვერტში, რომლებზეც არ უნდა იყოს მითითებული ავტორის/კონკურსანტის ვინაობა. დიდი ზომის კონვერტში უნდა მოათავსდეს საკონკურსო დიზაინის ესკიზები, დიზაინის შინაარსის განმარტება, აღწერილობის ტექსტი და კონცეფცია, ხოლო მცირე ზომის კონვერტში – განაცხადი.

3. ორივე კონვერტი უნდა მოათავსდეს ერთ დიდ კონვერტში, დაილუქოს და მიეთითოს მისამართი, ადრესატი და კონკურსის დასახელება: „ქ. თბილისი 0114, სანაპიროს ქ. #2 საქართველოს ეროვნულ ბანკს. „საკოლექციო დანიშნულების 1 ლარის ნომინალის მონეტის დიზაინის საკონკურსო ესკიზები“.

4. საკონკურსო მასალების მიღება იწარმოებს ყოველ სამუშაო დღეს 2018 წლის 10 ოქტომბრიდან, 2019 წლის 31 იანვრის ჩათვლით, დილის 10:00 საათიდან - 18:00 საათამდე, შემდეგ მისამართზე: ქ. თბილისი 0114, სანაპიროს ქ. #2 საქართველოს ეროვნული ბანკი.

**მუხლი 3. საკონკურსო ესკიზების განხილვისა და გამარჯვებული ესკიზების გამოვლენის ვადები და პირობები:**

1. საკონკურსო ესკიზების განხილვა და გამარჯვებულის გამოვლენა მოხდება მათი წარმოდგენის ვადის ამოწურვის შემდეგ, არაუგვიანეს ორი თვის განმავლობაში.
2. საკონკურსო მასალების გახსნა, განხილვა და შეფასება მოხდება დახურული წესით (კონკურსანტთა ვინაობა უცნობი იქნება კომისიის წევრთათვის) საქართველოს ეროვნული ბანკის პრეზიდენტის 2016 წლის 27 ივლისის N76/04 ბრძანებით შექმნილი „საკოლექციო დანიშნულების ლარის ბანკნოტებისა და მონეტების თემატიკის (თემის) განსაზღვრისა და დიზაინის ესკიზის / ესკიზების შერჩევის“ დროებითი კომისიის მიერ.
3. კომისიის მოთხოვნის შემთხვევაში კონკურსის მონაწილეს შესაძლებელია მოეთხოვოს დამატებითი ინფორმაციის წარმოდგენა. აღნიშნული ინფორმაცია კომისიას უნდა მიეწოდოს მოთხოვნიდან არაუგვიანეს 5 (ხუთი) სამუშაო დღეში.
4. საკონკურსო ესკიზების წარმოდგენის ფორმის დარღვევით და/ან 2019 წლის 31 იანვრის 18:00 საათის შემდეგ მიღებული საკონკურსო ესკიზები განხილვას არ ექვემდებარება.
5. ესკიზების შეფასება-შერჩევა მოხდება შემდეგი კრიტერიუმების გათვალისწინებით:
  - 5.1. კონცეფცია;
  - 5.2. კომპოზიციური გადაწყვეტა;
  - 5.3. წარმოდგენილი ესკიზების შესრულების ხარისხი;
6. გამარჯვებული ესკიზების თაობაზე გადაწყვეტილებას მიიღებს საქართველოს ეროვნული ბანკის საბჭო კომისიის მიერ ესკიზების განხილვის შედეგების გათვალისწინებით.
7. საქართველოს ეროვნული ბანკი იტოვებს უფლებას, ნებისმიერ დროს დისკვალიფიკაცია გაუკეთოს კონკურსანტს, თუ:
  - 7.1. კონკურსანტი არღვევს ან სრულად არ აკმაყოფილებს კონკურსის პირობებს და წესებს;
  - 7.2. კონკურსის მიმდინარეობის ან ესკიზების შერჩევის პროცედურების დროს ადგილი ექნება კონკურსანტის არაკეთილსინდისიერ ქმედებას;
  - 7.3. კონკურსანტის მიერ წარმოდგენილი ინფორმაცია აღმოჩნდება მცდარი.

**მუხლი 4. გამარჯვებული ესკიზებისთვის დაწესებული ჯილდოს ოდენობა და ანაზღაურების პირობები**

1. კონკურსში გამარჯვებული ესკიზებისთვის განსაზღვრულია ფულადი ჯილდო 10, 000 ლარი (კანონმდებლობით გათვალისწინებული ყველა გადასახადის ჩათვლით).
2. კონკურსში გამარჯვებული ესკიზების ავტორისთვის (კონკურსანტისთვის) აღნიშნული ფულადი ჯილდოს ანაზღაურება მოხდება გადარიცხვით კონკურსანტის საბანკო ანგარიშზე საქართველოს ეროვნული ბანკის ვებ-გვერდზე ([www.nbg.gov.ge](http://www.nbg.gov.ge)) კონკურსის შედეგების შესახებ ინფორმაციის გამოქვეყნების შემდეგ გამარჯვებულ კონკურსანტთან ხელშეკრულების (დანართი 2 ) გაფორმებიდან 10 (ათი) სამუშაო დღეში.

**მუხლი 5. საკონკურსო ესკიზ(ებ)ის შემდგომი განკარგვის პირობები**

1. კონკურსში გამარჯვებული ესკიზები და კონცეფცია ხდება საქართველოს ეროვნული ბანკის საკუთრება ამ ესკიზებისთვის განსაზღვრული ჯილდოს ავტორისთვის გაცემისთანავე, რაც გულისხმობს, რომ:
  - 1.1. საქართველოს ეროვნულ ბანკს აქვს მონეტების გამოშვების და მათი პოპულარიზაციის მიზნებისათვის მათი შემდგომი გამოყენების და/ან მოდიფიცირების უფლება კონკურსანტთან შეთანხმების გარეშე.
  - 1.2. საქართველოს ეროვნული ბანკი თავისუფალია ნებისმიერი ინტელექტუალური საკუთრების ან სხვა საავტორო, მომიჯნავე თუ ნებისმიერი დაკავშირებული უფლებებიდან გამომდინარე მოთხოვნებისა და/ან პასუხისმგებლობისაგან (ასეთის არსებობის შემთხვევაში), იმ შემთხვევაშიც, თუ ამ ესკიზებს და/ან კონცეფციას, მონეტების გამოშვებისა

და მისი პოპულარიზაციის მიზნებისათვის, გამოიყენებენ და/ან შეცვლიან საქართველოს ეროვნული ბანკის მიერ საამისოდ უფლებამოსილი პირები, რომლებიც ასევე თავისუფლდებიან ზემოაღნიშნული მოთხოვნებისა და/ან პასუხისმგებლობისგან.

2. კონკურსში გამარჯვებული ესკიზები და კონცეფცია რჩება საქართველოს ეროვნულ ბანკს. კონკურსში მონაწილე სხვა ესკიზები, კონკურსანტის მოთხოვნის შემთხვევაში, უბრუნდება ავტორს, ხოლო საქართველოს ეროვნულ ბანკში რჩება მათი ასლები.

## **მუხლი 6. გამარჯვებული ესკიზის ავტორთან ურთიერთობა**

კონკურსის დასრულების შემდეგ, საქართველოს ეროვნული ბანკის მიმართვის შემთხვევაში, გამარჯვებული კონკურსანტი ვალდებულია, მონაწილეობა მიიღოს ქართული ანბანის თემაზე საკოლექციო დანიშნულების 1 ლარის ნომინალის მონეტების დამზადებისას დიზაინის ელემენტების სრულყოფის პროცესში და წარმოადგინოს დიზაინის ვექტორული/ელექტრონული ფაილი.

## **მუხლი 7. კონკურსის შედეგების გამოქვეყნების ადგილი და ფორმა**

კონკურსის შედეგების შესახებ ინფორმაცია გამოქვეყნდება საქართველოს ეროვნული ბანკის ვებ-გვერდზე საბჭოს მიერ გამარჯვებული ესკიზის დამტკიცების თაობაზე გადაწყვეტილების მიღებიდან 5 (ხუთი) სამუშაო დღეში. გამარჯვებულ კონკურსანტს კონკურსის შედეგები ეცნობება პირადად.

## **მუხლი 8. სხვა პირობები:**

1. იმ შემთხვევაში, თუ კონკურსის ჩატარების თაობაზე განცხადებაში მითითებულ ვადაში არ იქნა წარმოდგენილი არც ერთი ესკიზი, კონკურსი ითვლება არშემდგარად, ხოლო თუ წარმოდგენილი არც ერთი ესკიზი არ იქნა მოწონებული და შერჩეული ობიექტური მიზეზებით, კონკურსი ითვლება დასრულებულად უარყოფითი შედეგით. ახალი კონკურსის გამოცხადების ან ამ მიზნით სხვა საშუალების ან მეთოდის გამოყენების თაობაზე გადაწყვეტილებას იღებს საქართველოს ეროვნული ბანკის საბჭო.
2. განსაკუთრებულ შემთხვევაში, გამოცხადებული კონკურსის გაუქმება შესაძლებელია მხოლოდ საქართველოს ეროვნული ბანკის საბჭოს გადაწყვეტილებით. გამოცხადებული კონკურსის გაუქმების შესახებ ინფორმაცია გამოქვეყნდება საკონკურსო ესკიზების წარმოდგენისათვის დადგენილი ვადის დასრულებამდე არანაკლებ 5 (ხუთი) კალენდარული დღით ადრე და იმავე საინფორმაციო საშუალებებში, რომლებშიც გამოქვეყნდა კონკურსის ჩატარების შესახებ განცხადება.
3. საკონტაქტო ნომერი დამატებითი ინფორმაციისათვის: (+995 32) 2 406 471 ელ-ფოსტა: [info@moneymuseum.nbg.ge](mailto:info@moneymuseum.nbg.ge)

**კონკურსანტის მიერ წარმოსადგენი განაცხადის ფორმა**

საქართველოს ეროვნული ბანკის აღმასრულებელ დირექტორს, საკოლექციო დანიშნულების ლარის ბანკნოტებისა და მონეტების თემატიკის (თემის) განსაზღვრისა და დიზაინის ესკიზის/ესკიზების შერჩევის დროებითი კომისიას  
**გ ა ნ ა ც ხ ა დ ი**

**ქართული ანბანის თემაზე საკოლექციო დანიშნულების 1 ლარის ნომინალის მონეტების დიზაინის ესკიზების შესარჩევ კონკურსში მონაწილეობის თაობაზე**

მე,.....,

*კონკურსანტის სახელი, გვარი (იურიდიული პირის შემთხვევაში - მისი საფირმო სახელწოდება და ხელმძღვანელი პირის სახელი, გვარი*

საქართველოს ეროვნული ბანკის მიერ ქართული ანბანის თემაზე საკოლექციო დანიშნულების 1 ლარის ნომინალის მონეტების დიზაინის ესკიზების შესარჩევ კონკურსში (შემდგომში - კონკურსი) მონაწილეობით, ვეთანხმები და ვაღიარებ კონკურსის წესებსა და პირობებს და ვადასტურებ, რომ კონკურსში ჩემს მიერ წარმოდგენილი დიზაინის ესკიზების და/ან კონცეფციის გამარჯვების შემთხვევაში, საქართველოს ეროვნული ბანკის სასარგებლოდ უარს ვამბობ ნებისმიერ ინტელექტუალური საკუთრების ან სხვა საავტორო, მომიჯნავე თუ ნებისმიერი დაკავშირებულ უფლებასა და ასევე ამ უფლებებიდან გამომდინარე ნებისმიერ მოთხოვნაზე, იმ შემთხვევაშიც, თუ ამ ესკიზებს და/ან კონცეფციას, მონეტების გამოშვებისა და მათი პოპულარიზაციის მიზნებისათვის, გამოიყენებენ და/ან შეცვლიან საქართველოს ეროვნული ბანკი და/ან საქართველოს ეროვნული ბანკის მიერ საამისოდ უფლებამოსილი პირები, რომლებიც ასევე თავისუფლდებიან ზემოაღნიშნული მოთხოვნებისა და/ან პასუხისმგებლობისგან.

გამარჯვების შემთხვევაში, მე უარს ვამბობ ჩემი, როგორც მონეტების დიზაინის ესკიზების და/ან კონცეფციის ავტორის სახელი მიეთითოს დიზაინის ესკიზის ყოველ ეგზემპლარზე ან შემდგომში მისი ნებისმიერი სახით გამოყენებისას.

მე, ქვემოთ ხელმომწერი, ჩემს მიერ წარმოდგენილი დიზაინის ესკიზების კონკურსში გამარჯვების შემთხვევაში, თანხმობას გამოვთქვამ და საქართველოს ეროვნულ ბანკს უფლებას ვაძლევ გამარჯვებულ დიზაინის ესკიზებთან და/ან კონცეფციასთან მიმართებაში ჩემი, როგორც მონეტების დიზაინის ესკიზების და/ან კონცეფციის ავტორის სახელი გამოიყენოს საჯარო გამოსვლებში, განცხადებებში, ვებ გვერდზე თუ ბეჭდვით საშუალებებში გავრცელებულ ინფორმაციაში, სატელევიზიო თუ რადიო განცხადებებში, ასევე ნებისმიერი სხვა ფორმით გაავრცელოს ისინი.

ჩემთვის ცნობილია და ვადასტურებ, რომ ჩემს მიერ საქართველოს ეროვნულ ბანკში წარმოდგენილი დიზაინის ესკიზებში ნებისმიერი სიმბოლოს, დეტალის, ელემენტის დ ა.შ. გამოყენებაზე უფლებრივ საკითხებთან დაკავშირებით პასუხისმგებლობა მეკისრება მოქმედი კანონმდებლობის შესაბამისად.

ამასთან, ვადასტურებ, რომ ჩემს მიერ წარმოდგენილი ესკიზები ქონებრივად და უფლებრივად უნაკლოა და ასეთი ნაკლოვანების აღმოჩენის შემთხვევაში პასუხისმგებლობა მეკისრება მოქმედი კანონმდებლობის შესაბამისად.

ვადასტურებ, რომ თანახმა ვარ, ჩემს მიერ საქართველოს ეროვნულ ბანკში წარმოდგენილი დიზაინის ესკიზების კონკურსში გამარჯვებისა და საქართველოს ეროვნული ბანკის შესაბამისი მოთხოვნის შემთხვევაში მოვახდინო ამ ესკიზების ცვლილება ან მონაწილეობა მივიღო **ქართული ანბანის თემაზე საკოლექციო დანიშნულების 1 ლარის ნომინალის მონეტების დამზადებისას** დიზაინის ელემენტების სრულყოფის პროცესში.

ვადასტურებ, რომ თანახმა ვარ, ჩემს მიერ საქართველოს ეროვნულ ბანკში წარმოდგენილი დიზაინის ესკიზების კონკურსში გამარჯვების შემთხვევაში ხელი მოვაწერო **ქართული ანბანის თემაზე საკოლექციო დანიშნულების 1 ლარის ნომინალის მონეტების** დიზაინის ესკიზების შესარჩევი კონკურსის გამარჯვებულისათვის ჯილდოს გადაცემის პირობების შესახებ“ ხელშეკრულებას ამ კონკურსით გათვალისწინებულ პირობების მიხედვით.

კონკურსანტის სახელი და გვარი: \_\_\_\_\_ (იურიდიული პირის შემთხვევაში - მისი ხელმძღვანელის სახელი და გვარი)

კონკურსანტის პირადი ნომერი: \_\_\_\_\_  
(იურიდიული პირის შემთხვევაში - მისი საფირმო სახელწოდება)

კონკურსანტის საკონტაქტო ტელ: \_\_\_\_\_ ელ-ფოსტა: \_\_\_\_\_

თარიღი: \_\_\_\_\_

კონკურსანტის ხელმოწერა: \_\_\_\_\_

**ხ ე ლ შ ე კ რ უ ლ ე ბ ა**

**ქართული ანბანის თემაზე საკოლექციო დანიშნულების 1 ლარის ნომინალის მონეტების დიზაინის ესკიზების შესარჩევი კონკურსის გამარჯვებულისათვის ჯილდოს გადაცემის პირობების შესახებ**

ქ. თბილისი

საქართველოს ეროვნული ბანკი (შემდგომში – ეროვნული ბანკი) წარმოდგენილი აღმასრულებელი დირექტორის გიორგი მელაშვილის სახით, მისამართი: სანაპიროს N2, თბილისი 0114, საქართველო, საიდენტიფიკაციო კოდი: 203 824 148, ერთის მხრივ, და \_\_\_\_\_ (დაბ: \_\_\_\_\_ წ პირადი N \_\_\_\_\_, მისამართი თბილისი,- \_\_\_\_\_) (შემდგომში - გამარჯვებული), მეორე მხრივ, ვდებთ შეთანხმებას შემდეგზე:

**მუხლი 1. ხელშეკრულების საგანი**

ხელშეკრულების საგანია ეროვნული ბანკის მიერ ქართული ანბანის თემაზე საკოლექციო დანიშნულების 1 ლარის ნომინალის მონეტების (შემდგომში - მონეტა) დიზაინის ესკიზების (შემდგომში - ესკიზი) შესარჩევ კონკურსში გამარჯვებულისათვის ჯილდოს გადაცემა და ეროვნული ბანკის მოთხოვნის შემთხვევაში, გამარჯვებულის მიერ შესაბამისი ესკიზების დახვეწა-განვითარების პროცესში მონაწილეობა, ამ ხელშეკრულების პირობების მიხედვით.

**მუხლი 2. მხარეთა უფლებები და ვალდებულებები**

1. ეროვნული ბანკი გამარჯვებულს გადასცემს 10,000 (ათი ათასი) ლარს კონკურსში გამარჯვებულისათვის ჯილდოს სახით. აღნიშნული თანხა მოიცავს კანონმდებლობით გათვალისწინებულ ყველა გადასახადს. თანხის გადახდა განხორციელდება ამ ხელშეკრულების ხელმოწერიდან 10 (ათი) სამუშაო დღის ვადაში გამარჯვებულის საბანკო ანგარიშზე - GEXXXXXXXX ჩარიცხვით.
2. ეროვნული ბანკი უფლებამოსილია, გამარჯვებულს მოთხოვოს შერჩეული კონცეფციის მიხედვით ქართული ანბანის სერიის ფარგლებში გამოსაშვები ასო-ნიშნების ამსახველი შესაბამისი მონეტების დიზაინის ესკიზების სრულყოფილი , მაღალი ხარისხის ფაილები
3. ამ მუხლის მე-2 პუნქტის შესაბამისად, ეროვნული ბანკის მიმართვის შემთხვევაში, გამარჯვებული ვალდებულია, უზრუნველყოს ესკიზ(ებ)ის მომზადება ეროვნული ბანკის მოთხოვნების გათვალისწინებით და მათი წარდგენა ეროვნული ბანკისთვის მისი მიმართვიდან არაუგვიანეს 1 თვეში;
4. ეროვნული ბანკი უფლებამოსილია მონეტების გამოშვების და/ან მათი პოპულარიზაციის მიზნით მოახდინოს გამარჯვებულის მიერ წარმოდგენილი ესკიზების შემდგომი გამოყენება და/ან მოდიფიცირება გამარჯვებულთან შეთანხმების გარეშე.
5. ეროვნული ბანკი თავისუფალია ნებისმიერი ინტელექტუალური საკუთრების ან სხვა საავტორო, მომიჯნავე თუ ნებისმიერი დაკავშირებული უფლებებიდან გამომდინარე მოთხოვნებისა და/ან პასუხისმგებლობისაგან (ასეთის არსებობის შემთხვევაში), იმ შემთხვევაშიც, თუ გამარჯვებულ ესკიზებს, მონეტების გამოშვების მიზნებისათვის და მისი პოპულარიზაციისათვის, გამოიყენებენ და/ან შეცვლიან ეროვნული ბანკის მიერ საამისოდ უფლებამოსილი პირები, რომლებიც ასევე თავისუფლდებიან ზემოაღნიშნული მოთხოვნებისა და/ან პასუხისმგებლობისგან.



6. გამარჯვებული ამ ხელშეკრულების ხელმოწერით მის მიერ წარმოდგენილ ესკიზებთან დაკავშირებით:
  - ა) ეროვნული ბანკის სასარგებლოდ უარს აცხადებს ნებისმიერ საავტორო, ქონებრივ და მომიჯნავე უფლებაზე, ასეთის არსებობის შემთხვევაში, ასევე ამ უფლებებიდან გამომდინარე ნებისმიერ უფლებასა თუ მოთხოვნაზე;
  - ბ) უარს აცხადებს უფლებაზე, რომ მისი სახელი, როგორც ესკიზის ავტორისა, მითითებულ იქნეს ესკიზების ყოველ ეგზემპლარზე ან მისი ნებისმიერი სახით გამოქვეყნებისას;
  - გ) თანხმობას აცხადებს მისი სახელი და გვარი, გამარჯვებულ ესკიზებთან მიმართებაში, საქართველოს ეროვნული ბანკის მიერ გამოყენებული იყოს საჯარო გამოსვლებში, განცხადებებში, ვებ-გვერდზე თუ ბეჭდვით საშუალებებში გავრცელებულ ინფორმაციაში, სატელევიზიო თუ რადიო განცხადებებში, ასევე, ეროვნული ბანკის შეხედულებისამებრ, ნიმუშის ნებისმიერი ფორმით გავრცელების დროს.
7. გამარჯვებული ამ ხელშეკრულების ხელმოწერით ადასტურებს, რომ მას არ გააჩნია და/ან არ შეიძლება გააჩნდეს რაიმე სახის, კანონმდებლობიდან თუ სახელშეკრულებო ურთიერთობიდან გამომდინარე პრეტენზია ეროვნული ბანკის მიმართ გამარჯვებულის მიერ წარმოდგენილი ესკიზის გამოყენებასთან და/ან მოდიფიცირებასთან დაკავშირებით იმ შემთხვევაშიც კი, თუ ამ ესკიზს, მონეტის გამოშვებისა და მისი პოპულარიზაციის მიზნებისათვის, გამოიყენებენ და/ან შეცვლიან საქართველოს ეროვნული ბანკი და/ან საქართველოს ეროვნული ბანკის მიერ საამისოდ უფლებამოსილი პირები, რომლებიც ასევე თავისუფლდებიან ზემოაღნიშნული მოთხოვნებისა და/ან პასუხისმგებლობისგან.
8. „საავტორო და მომიჯნავე უფლებების შესახებ“ საქართველოს კანონის თანახმად, ეროვნული ბანკის მიერ ესკიზების გადამუშავებით შექმნილ ნებისმიერ ობიექტზე საავტორო და ქონებრივი უფლებების მესაკუთრეა ეროვნული ბანკი და გამარჯვებული არ არის უფლებამოსილი ეროვნულ ბანკს პრეტენზიები წარუდგინოს ამ უკანასკნელის მიერ შექმნილ ობიექტთან დაკავშირებით.
9. გამარჯვებული ადასტურებს, რომ მის მიერ ეროვნულ ბანკში წარმოდგენილ ესკიზებში ნებისმიერი სიმბოლოს, დეტალის, ელემენტის დ ა.შ. გამოყენებაზე უფლებრივ საკითხებთან დაკავშირებით პასუხისმგებლობა ეკისრება თავად გამარჯვებულს მოქმედი კანონმდებლობის შესაბამისად.
10. გამარჯვებული ამ ხელშეკრულების ხელმოწერით ადასტურებს, რომ მის მიერ წარმოდგენილი ესკიზები ქონებრივად და უფლებრივად უნაკლოა და ასეთი ნაკლოვანების აღმოჩენის შემთხვევაში პასუხისმგებლობა ეკისრება თავად გამარჯვებულს მოქმედი კანონმდებლობის შესაბამისად.
11. გამარჯვებული ვალდებულია:
  - ა) ეროვნული ბანკის მოთხოვნის შემთხვევაში, მონაწილეობა მიიღოს ესკიზების დახვეწა-განვითარებაში და განახორციელოს შესაბამისი სამუშაოები;
  - ბ) ეროვნულ ბანკს, მოთხოვნის შემთხვევაში, გადასცეს ესკიზებთან დაკავშირებული ყველა მასალა როგორც მატერიალური, ასევე ელექტრონული ფორმით.
  - გ) მოთხოვნის შემთხვევაში, ეროვნულ ბანკს გადასცეს ესკიზებთან დაკავშირებული ის ინფორმაცია და დოკუმენტაცია, რომელიც საჭიროა ესკიზების დამუშავებისათვის.
12. ინტელექტუალურ საკუთრებასთან დაკავშირებით ამ მუხლით გათვალისწინებული ვალდებულებები მხარეებისათვის ძალაში რჩება ამ ხელშეკრულების შეწყვეტის შემდეგაც.
13. გამარჯვებულის მხრიდან ამ ხელშეკრულებით გათვალისწინებული პირობების დარღვევის ან თავისი ვალდებულებების არაჯერონად შესრულების შემთხვევაში ეროვნული ბანკი უფლებამოსილია ვადამდე შეწყვიტოს გამარჯვებულთან ურთიერთობა და გამარჯვებულს

მოსთხოვოს ვალდებულების შეუსრულებლობით ან არაჯეროვნად შესრულებით გამოწვეული ნებისმიერი ზიანის ანაზღაურება.

### **მუხლი 3. სხვა დებულებები**

1. ეს ხელშეკრულება შედგენილია საქართველოს კანონმდებლობის შესაბამისად. ამ ხელშეკრულების შესრულებისას წამოჭრილი დავა მხარეებმა უნდა გადაჭრან ურთიერთმოლაპარაკების და კონსულტაციების გზით, წინააღმდეგ შემთხვევაში მხარეებს შეუძლიათ მიმართონ სასამართლოს.
2. სასამართლოსათვის მიმართვის შემთხვევაში, საკითხს განიხილავენ საქართველოს სასამართლოები საქართველოს კანონმდებლობის შესაბამისად.
3. ხელშეკრულებაში ცვლილებები და დამატებები ხორციელდება მხარეთა წერილობითი შეთანხმებით, რომელიც ჩაითვლება ხელშეკრულების განუყოფელ ნაწილად.
4. ხელშეკრულება შედგენილია ქართულ ენაზე, თანაბარი იურიდიული ძალის მქონე სამ ეგზემპლარად, აქედან ორი ეგზემპლარი გადაეცემა ეროვნულ ბანკს, ხოლო ერთი ეგზემპლარი გადაეცემა გამარჯვებულს
5. ხელშეკრულება ძალაშია მხარეების მიერ ხელმოწერის დღიდან.

---

საქართველოს ეროვნული ბანკი